



## **Aningaasaqarnermut Naalakkersuisoq**

**Nuutinneri:** Kultureqarnermut Ilinniartitaanermullu  
Ataatsimiititaliaq

**Aningaasaqarnermut Ataatsimiititaliap suliaq nr. 01.31.06/10-00458 pillugu tallimangornermi ulloq 12. februar 2010 aalajangerneranik Naalakkersuisunut ilisimatitsineq.**

**Nuna tamakkerlugu TV-kkut nassitsissutinik digitaliusunik pilersuinissaq pillugu TELE Greenland A/S-imut ukiuni qulini atuuttussamik isumaqatigiissusiornissamut qinnuteqaat**

Naalakkersuisut **inassutigaat**,

- Kontop pingaarnep 73.01.05-ip, Kalaallit Nunaanni TV-kkut radiukkullu aallakaatitanik siammarterinermut tunngasup, iluani aningaasaqarnikkut killissarititaasut iluanni 2010-miit 2019-imut DVB-T-kkut nassitsissutinik ineriartortitsinissaq, ikkussuinissaq ingerlatsinissarluk kiisalu radiukkut signalinik siaruarterinissaq pillugit Ineqarnermut, Attaveqarnermut Angallanermullu Naalakkersuisoq TELE Greenland A/S-imut isumaqatigiissuteqarnissamut piginnaatinneqassasoq, aamma
- kontomi pingaarnep 73.01.05-imi, Kalaallit Nunaanni TV-kkut radiukkullu aallakaatitanik siammarterinermut tunngasumi, aningaasaliissutit 400.000 koruuninik ikilineqassasut
- kontomi pingaarnep 40.94.17-imi, Kalaallit Nunaata Radiua – KNR-imut tunngasumi, aningaasaliissutit 400.000 koruuninik amerlineqassasut.

**Aningaasaqarnermut Ataatsimiititaliap oqaaseqaatai**

TV-kkut nassitsissutinik digitaliusunik pilersuinissaq pillugu TELE Greenland A/S-imut ukiuni qulini atuuttussamik isumaqatigiissusiornissamut aningaasaliissutitigut tunngavissinneqarnissaq Naalakkersuisut suliami matumani qinnutigaat.

Aningaasaliissuteqarnissamut siunertaq Aningaasaqarnermut Ataatsimiititaliamit ajoriffissaqartinneqanngilaq, taamaattumillu qinnuteqaat akuerisinnaallugu.

TV-kkut digitaliusumik atortut nammineerluni ilaannaasumik akiliisarnissamik suliaqarnissamut piareersagaasut ilanngussami ilanngullugu nassiunneqartumi takuneqarsinnaavoq. Inuiaqatigiinni atuisartut annertunerusumik akiliisalernissaannik apeqqut sukumiisumik oqallisigineqartariaqartoq aammalu tamatumani pitsaaqutit pitsaannequtillu nalilerneqartariaqartut Aningaasaqarnermut Ataatsimiititaliaq ataatsimut isigalugu isumaqarpoq. Tamanna tunngavigalugu nammineq akiliuteqartarnermut/atuisartuninik

akiliuteqartitsisarnermut nalinginnaasumik tunngatillugu aammalu TV-kkut digitaliusumik ingerlatsinermut immikkut tunngatillugu Naalakkersuisut namminneq takorluugaannik erseqqinnerusumik ilisimatinneqarnissani ataatsimiititaliap qinnutigaa.

Tamatuma saniatigut pisortat innuttaasunut sullississutaanni akigitinneqartut sapinngisamik annertunerpaamik ersarissuullutillu paasiuminartuunissaat anguniarneqassasoq Aningaasaqarnermut Ataatsimiititaliaq isumaqarpoq.

Kultureqarnermut Ilinniartitaanermullu Ataatsimiititaliaq aalajangiinerup matuma nuutinneranik nassinneqarpoq, taamaaliluni ataatsimiititaliaq Naalakkersuisunik suleqateqarluarnermigut matumani iliuseriniakkamik kiisalu tusagassiusarnermi nalinginnaasumik politikerineqartumut aammalu TV aqqutigalugu siunissami paasissutissinneqarnissamut ilisimasanillu tuniorarneqarnissamut ullumikkut siunissamilu innuttaasut pisariaqartitaannik qulakkeerinninnissamut sanilliullugu naliliisinnaaqullugu.

### **Aningaasaqarnermut Ataatsimiititaliap aalajangiinera**

Naalakkersuisut inassuteqaataat Aningaasaqarnermut Ataatsimiititaliamit **akuerineqarput**. Tamatuma peqatigisaanik oqaaseqaatinut apeqqutinut siuliani allassimasunut Naalakkersuisut oqaaseqaataasa allakkat uku tigunerannit ullut 14-it qaangiutsinnagit tiguneqarnissaat ataatsimiititaliamit qinnutigineqarput. Naalakkersuisut allagaat kalaallisut danskisullu nassiunneqarnissaat qinnutigineqarpoq nuutinnerallu qarasaasiakkut uunga nassiuteqquneqarluni: [nch@ina.gl](mailto:nch@ina.gl).

Aningaasaqarnermut Ataatsimiititaliaq sinnerlugu

Naaja Nathanielsen

Aningaasaqarnermut Ataatsimiititaliap siulittaasua